



UKA 2018/137

24/10-2018

Randi Vestergaard Evaldsen

Kingusinnerpaamik UPA 2019-mi Majoriaq pillugu naliliinermik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Naliliinermi nassuiarneqassaaq, innuttaasut ilinniarnissaannut sulilernissaannullu, piareersaasarnissaminut Majoriap siunertani qanoq naammassitigisimaneraa. Naliliinermut ilanngullugu aamma maannamut misilittakkat tunngavigalugit pitsanngorsaannissanut sipaarutissanullu siunnersuutit ilannguteqquneqarput.

(Inatsisartunut ilaasortaq Nivi Olsen, Demokraatit)

(Siullermeerinninneq)

Aallaqqaammut Inatsisartunut ilaasortaq Nivi Olsen qutsavigerusuppata manna aalajangiiffigisassatut siunnersuut pillugu.

Inuiaqatigiittut Majoriamut 100 millioner koruunit sinnerlugit atortarpagut. Aningaasarpassuupput aamma pingaaruteqarpoq ilisimassallugu aningaasaliissutigut inerititaqarluartarnersut. Majoriaq assersuutissatsialaavoq iluarsiiguasuarnermut. Iluamik pisuugutta taama aningaasat amerlatigisut pineqartumut atortariaqanngikkaluarpagut, paarlattuanilli meeqqat inuusuttullu sulilernissaannut ilinnialernissaannullu piareersarnerannut atortariaqaraluarput. Tassanilu annermik eqqarsaatigaara meeqqat atuarfiat.

Meeqqat atuarfeqarfii ingerlalluartuuppata piviusorsiorlutillu, taava aningaasat taama amerlatigisut Majoriami atortariaqanngikkaluarpagut. Taama naatsigisumik oqaatigineqarsinnaavoq. Uani innersuussutigineqartoq nassuiaasiornissaq piginngikkaluarluguluunniit takusinnaareerpara arlaannik ataqatigiinngitsoqartoq. Allatut ajornartumik ajornartorsiutip aallaavia sumiiffissisariaqarparput.

Demokraatini qiviarusuppagut ukiut siulliit, atualernissamut piareerneq sualummillu meeqqat atuarfiat. Allatut ajornartumik meeqqat atuarfiat suliniarfiginerusariaqarparput, nukittorsarlugu eqaallisarlugulu. Ullumikkut atuarfik sanarfinikuuarput ilaatigut Danmarkimi pissutsit issuarlugit uanga isumaga naapertorlugu tamanna uangutsinnut inuiaqatigiinnut tulluanngilaq. Ullumikkut meeqqat atuartittarpagut ilinniartuunngorniarfik anguniassammassuk - tamanna nammineq ajunngikkaluarpoq, kisianni kina oqarpa kikkut tamarmik aqqut taanna atuallassagaat? Meeqqat atuarfianni soraarummeernermi angusat suli nakeriallannartorujussuupput. Allatut oqaatigalugu pissutsit imaapput, sulliviit sulisussanik amingaateqarlutik sualummik assassorlutik sulisartunik - taamaakkaluartoq suliffissaaleqisoqarpoq kaasimaartunik taamaakkaluartoq Majoriamut ukiut tamaasa atortarpagut 100 millioner koruunit.

Majoriamut 100 millioner koruunit atortakkagut taamaallaat atorneqartarput ilaartuutitut neriuppugulli atorunnaariartorumaartoq amerlanerit meeqqat atuarfianni angusarissarlutik soraarummeertalerpata, taamakkaluartorli suli pingaaruteqarpoq aningaasat taama amerlatigisut mianersortumik suliniutinullu eqqortunut atorneqarnissaat. Pingaaruteqarpoq ilisimassallugu aningaasat atorluarneqartarnersut



imaluunniit pitsanngorsaaniissamut inissaqarnerseq. Qullarinngilluinnarpara immikkoortumi pisatsinni aningaasanik sipaartoqarsinnaakuttoortoq.

Politikeritut akisussaaffik tigusariaqarparput siunissarlu pillugit takorluuillaqqinnerulerluta. Immikkoortumi uangut takorluugarput tassaavoq nunatsinni inuit peqqissut tamarmik ilinniagaqassasut suliffeqarlutilluunniit, taama naatsigisumik oqaatigineqarsinnaavoq. Pisariaqarpoq kikkut tamarmik inuiaqatigiit ingerlanneqarnerannut iluaqusiisinnaasut, iluaqusiisarnissaat.

Tamanna tunngavigalugu siunnersuuteqartoq isumaqatigaarput soorunami suliat ukiut tamaasa inuiaqatigiinnut akisoqisut nalilersorneqartariaqartut.

Siunnersuut Inuutissarsionermut Ataatsimiititaliamut ingerlateqqipparput.